

يا ام الجدائل سمر



يعني انتي خلاص .. مش عارفة
إني محوَّش جَوَّا عنيكِي .. بواقي العمر
واني باصالح روحي بطيفك .. لَمَّا يمرّ
واني بحايل نبضة ف قلبك
يمكن تبعث نظره تسرّ
يابت يا ام جدائل سمر
ماسمعتيش ف سكوتي بحبك
ولا شوفتيش على شط منامك
إني الحلم الطارح بكره
جَوَّا جنائيك .. عش غرامك
ولا حسيتي بنظرة عيني
نازلة تحنّي كفوف أيامك
مش معقول..
وبجد بقول لك ..

إني هاعيش العمر ف ضلك
هازرع ضلة قدام بابك
واطرح فله على شِبَّاك
وابعت ليلى يحل عينك
واغزل توبك.. من أفرحي
والقى الشمس مخاصمة صباحي
حتى الورده اللي ف بستاني
نشّف ريقها كُتر نواحي
ليه ابنيلك جَوَّا قصايدي
قصر ونسمة وغنوة طير
واهدي بحور الشعر عبيرك
قلبي خلاص ف هواي أسير
لا يا حبيبتي .. أنا آسف جدا
شاخ الصبر ما بين أوجاعي
كل عروق العشق بتدبل
لما حروفك تبقى وداعي